

दिनांक 19.07.2024

समय: 18.45 बजे

आकाशवाणी जयपुर-अजमेर  
प्रादेशिक समाचार

- केन्द्र सरकार कानी ऊं महिला कारोबारियां ने बधावो देवण सारु पहलो "यशस्विनी" जागरूकता अभियान सरु व्हयो- केंद्रीय मंत्री जीतनराम मांझी जयपुर मांय उद्घाटन कीनो।
- कोटा मांय ग्रीन फील्ड हवाई अड्डो बणावण सारु राज्य सरकार अर एयरपोर्ट अथॉरिटी ऑफ इण्डिया बीचे करार करी ज्यो।
- प्रदेश मांय चालू माली साल मांय एक लाख घरां मांय पाईप लेण रे जरिये रसोई गैस पूगायी जावेला।
- मौसम विभाग आज अजमेर, भीलवाड़ा, टोंक अर कोटा मांय तेज बारिश सारु चेतायो।

केन्द्र सरकार कानी ऊं महिला कारोबारियां री मदद करण रा मकसद ऊं पहलो "यशस्विनी" जागरूकता अभियान आज जयपुर मांय सरु व्हयो। केंद्रीय एम.एस.एम.ई. मंत्री जीतन राम मांझी इण रो उद्घाटन कीनो। ई मौके वे कह्यो के खुद रा काम-धंधा करण मांय महिलावां ने आगे लावण रा मकसद ऊं 'यशस्विनी' अभियान चलायी ज्यो है।

मांझी कह्यो के एम.एस.एम.ई. इकाइयां ने आगे बधावण सारु सरकार बैंक गारंटी देवे है अर बैंकां ने आं इकाइयां ने आसानी ऊं कर्ज मुहैया करावणा चाहिजे। कार्यक्रम मांय एम.एस.एम.ई. राज्य मंत्री शोभा करंदलाजे कह्यो के महिलावां ने कारोबारी बणावण सारु केन्द्र सरकार केई योजनावां चला रही है अर महिलावां ने आं रो पूरो फायदो लेवणो चाहिजे। कार्यक्रम मांय 600 ऊं बत्ती महिला करोबारी, खुद सेवक समूहां री सदस्य, कारीगर अर आवता बगत मांय कारोबार करण री मंशा राखण वाली महिलावां सिरकत कर रही है।

कोटा मांय ग्रीनफील्ड हवाई अड्डो बणावण सारु करार करी ज्यो है। आज जयपुर मांय मुख्यमंत्री भजन लाल शर्मा री मौजूदगी मांय भारतीय विमानपत्तन प्राधिकरण रा अध्यक्ष संजीव कुमार, नागरिक उड्डयन मंत्रालय रा अतिरिक्त मुख्य सचिव शिखर अग्रवाल अर नगरीय विकास विभाग रा प्रमुख शासन सचिव टी. रविकान्त करार माथे सही कीनी। भारतीय विमानपत्तन प्राधिकरण रा अध्यक्ष संजीव कुमार बतायो के कोटा ग्रीनफील्ड हवाई अड्डो बणावण सारु विगतवार परियोजना रपट बणायी जा रही है। नगरीय विकास विभाग रा प्रमुख शासन सचिव टी. रविकान्त बतायो के ओ हवाई अड्डो राजस्व गांवां तुलसी, कैथुदा, बालापुरा अर देवरिया री 440 हैक्टेयर जमीन माथे बणायो जावेला। ई मौके मुख्यमंत्री भजनलाल शर्मा कह्यो के जनता ने नुवा हवाई सुबीता मुहैया करावण सारु कोटा ग्रीनफील्ड हवाई अड्डो घणो खास साबित व्हेला। मुख्यमंत्री कह्यो के जयपुर हवाई अड्डा रो बूतो ई बधायो जा रह्यो है।

वे कह्यो के राज्य सरकार उदयपुर हवाई अड्डा ने और मोटो बणावण अर बाङ्मेर रा उतरलाई हवाई अड्डा माथे स्थायी सिविल एन्क्लेव अर सड़क बणावण सारू मुफ्त जमीन मुहैया करावेला।

मुख्यमंत्री भजनलाल शर्मा कह्यो है के राज्य री मौजूदा सरकार रा पहला ई बजट मांय हर विधानसभा हलका मांय हर तबका री जनता ने साता देवण री कोशिश करी ज्यी है। वे आज जयपुर मांय वां रा रहवास माथे लालसोट विधानसभा हलका री जनता कानी ऊं राख्यी ज्यी आभार सभा मांय बोल रह्या हा। वे कह्यो के लालसोट विधानसभा हलका रा विकास सारू बजट मांय केई खास प्रावधान करी ज्यी है। ई मौके लालसोट रा विधायक रामबिलास बजट मांय दौसा जिला अर लालसोट सारू करी ज्यी प्रावधानां बाबत् मुख्यमंत्री रो आभार जतायो।

प्रधानमंत्री किसान सम्मान निधि रा तहत प्रदेश रा 65 लाख किसानां रा खातां मांय साढ़े छः सौ करोड़ रूप्या भेजी ज्यी है। सहकारिता मंत्री गौतम कुमार आज विधानसभा मांय पूरक सवालां रा जवाब मांय आ जाणकारी दीनी। विधायक मनीष यादव रा सवाल रा लिखित जवाब मांय सहकारिता मंत्री बतायो के पीएम-किसान सम्मान निधि रा तैत हर पात्र किसान पिरवार ने दी जावण वाळी मदद री रकम 6 हजार ऊं बधा र 8 हजार रूप्या सालाना करण रो ऐलाण करी ज्यो है। वे बध्योड़ी रकम रो एक मुश्त चुकारो करण रा मुद्दा माथे कह्यो के ऐडो कोई प्रस्ताव नी है।

विधानसभा मांय विपक्ष रा नेता टीकाराम जूली कानी ऊं विधानसभा अध्यक्ष वासुदेव देवनानी ने धृतराष्ट्र केहवण रा मामला मांय सदन मांय आज जोरदार हंगामो व्ह्यो। ई कारण सदन री कार्यवाही पैली एक घंटा तांई अर पाछे आधा घंटा सारू टाळणी पड़ी। कार्यवाही ओजू सरू व्हेतां ही स्पीकर कांग्रेस रा विधायक हरीश चौधरी रे ठाकुर का कुआं कविता बांचण अर विपक्ष रा नेता अर मंत्री अविनाश गहलोत री टिप्पणियां ने सदन री कार्यवाही ऊं निकाळबा रा हुकम दीना। देवनानी कह्यो के वे सियासत मांय हर एक सागे एक सरीखो व्यवहार कीनो। स्पीकर कह्यो के पख अर विपक्ष रा सगळा विधायकां ने नियम अर परंपरावां रो ध्यान राखणो चाहिजे। इण ऊं पैली शून्यकाल रे दौरान कार्यवाही सरू व्हेता ही विपक्ष रा नेता टीकाराम जूली अनुदान मांगां माथे जवाब रे दौरान काल व्ह्या हंगामा अर मंत्रियां रा आचरण रो मुद्दो उठायो। वे कह्यो के काल मंत्री जेडो व्यवहार कीनो अर असंसदीय शब्द बोल्या, वां ने सदन री कार्यवाही ऊं नीं निकाळी ज्यी, ई कारण सदन रे बाहर जा र बोलण री जरूरत पड़ी। ई दौरान जूली अर स्पीकर देवनानी बीचे तकरार व्ही।

प्रदेश मांय चालू माली साल मांय जयपुर अर कोटा समेत 8 शहरां मांय 2 हजार किलोमीटर लम्बी गैस पाईप लाईन बिछाई जावेला। खान सचिव आनन्दी आज जयपुर मांय राज्य रा शहरां मांय गैस पूगावण वाळी 13 संस्थावां अर संबंधित महकमां रा अहलकारां री राज्य स्तर री मीटिंग मांय आ जाणकारी दीनी। वे बतायो के जयपुर, कोटा, अलवर, जोधपुर, उदयपुर, बूंदी, अजमेर अर पाली मांय 2 हजार किलोमीटर लंबी गैस पाईपलाईन बिछावण सारू संबंधित सीजीडी संस्थावां ने कार्ययोजना बणा र लागू करण रा हुकम दिया ज्यी है। आनन्दी बतायो के ई साल पाईप लाईन रे जरिये एक लाख घरेलू गैस कनेक्शन दिया जावेला। मीटिंग मांय राजस्थान स्टेट गैस लिमिटेड रा मैनेजिंग डायरेक्टर रणवीर सिंह बतायो के प्रदेश रा न्यारा-न्यारा हलकां मांय 13 संस्थावां सीजीडी रा काम कर रही है। वे बतायो के पाईप लाईन रे जरिये हाल तांई 3 लाख 9 हजार ऊं बत्ता घरेलू गैस कनेक्शन अर 465 औद्योगिक कनेक्शन जारी कर्या जा चुक्या है।

राज्यपाल कलराज मिश्र आज उत्तर प्रदेश री राज्यपाल आनन्दी बेन पटेल सागे लखनऊ मांय मुलाकात कीनी। वे उत्तर प्रदेश रा मुख्यमंत्री योगी आदित्यनाथ सागे ई शिष्टाचार भेंट कीनी।

प्रदेश का केई हलकां मांय आज ही मेह बरस्यो। भीलवाड़ा मांय कटे-कटे हल्की बिरखा व्ही। श्रीगंगानगर रा गजसिंहपुर मांय चोखो मेह व्ह्यो। मौसम विभाग रे मुजब मानसून री ट्रफ लाइन आज ई सामान्य ऊं दक्षिण मांय बण्योड़ी है जिण रा असर ऊं राज्य रा ऊगणी हलकां मांय कटे-कटे आवता दिनां बिरखा चालती रेहवण रा आसार है। राज्य रा ऊगणी हलकां मांय दीतवार अर सोमवार ने बिरखा और तेज व्हेवण अर कोटा, उदयपुर, जयपुर, अजमेर अर भरतपुर संभाग मांय कटे-कटे जोरदार मेह व्हेवण रा आसार है, जद के जोधपुर अर बीकानेर संभाग रा कुछ हलकां मांय आवता दिनां बादळां री गाज सागे बिरखा व्हेवण री संभावना है। मौसम विभाग आज अजमेर, भीलवाड़ा, टोंक अर कोटा मांय तेज बरसात व्हेवण अर बीजळी पडबा सारु चेतायो है। ई बीचे पाली जिला मांय मारवाड़ जंक्शन कने आउवा गांव मांय एक रूखड़ा हेटे ऊबी टाबरी री बीजळी पड जावण ऊं मौत व्हे ग्यी।

युवा मामलात अर खेल मंत्री डॉ. मनसुख मांडविया कह्यो है के भारत ने साल 2047 ताई विकसित देश बणावण मांय खेलां रो खास काम व्हेला। वे आज नई दिल्ली मांय भारत रा ओलंपिक अर पैरालंपिक खिलाड़ियां सागे बातचीत कर रह्या हा। ई मौके वे "पाथवे टू पेरिस" किताब जारी कीनी। साल 2004 मांय व्ह्या एथेंस पैरालंपिक मांय सोना रा तमगो जीतण वाळा देवेन्द्र झाझड़िया आकाशवाणी सागे बातचीत मांय ओलंपिक खेलां मांय भारत री उम्मीदां रा बारा मांय बतायो।

ओलंपियन जीतू राय भारत रा खिलाड़ियां कानी ऊं पेरिस ओलंपिक खेलां मांय बेहतर प्रदर्शन करण रो भरोसो जतायो।

केंद्रीय संचार ब्यूरो रा सवाईमाधोपुर क्षेत्रीय कार्यालय री ओर ऊं आज कुशतला गांव मांय जागरूकता कार्यक्रम राख्यी ज्यो। इण मांय तीन नुवा आपराधिक कानून, साइबर अपराध, मानव तस्करी, विश्व जनसंख्या दिवस, प्रधानमंत्री सूर्य घर योजना अर बिरखा रा पाणी ने बचावण रा बारा मांय जाणकारी दीरीजी। कार्यक्रम मांय चित्रकला अर मौखिक प्रश्नोत्तरी समेत न्यारी-न्यारी होड़ां जीतण वाळां ने ईनाम दे र नवाजी ज्या।

ई मौके लोक कलाकार नुक्कड़ नाटक अर लोकगीतां रे जरिये सराकरी योजनावां रो प्रचार करी ज्यो। ई मौके एक पेड़ मां के नाम अभियान रा तहत पौधा रोपी ज्या।

गंगापुरसिटी मांय हरियालो राजस्थान अभियान रा तहत कुशालगढ़ लेक उद्यान मांय आज एक मिनट मांय 200 पौधा रोपी ज्या। आं मांय दस ऊं पन्द्रह फीट ताई ऊंचा बरगद, पीपल, करंज अर कदम्ब रा छायादार पौधा शामिल है। स्कूली टाबरियां ने आं पौधां री देखभाल जिम्मेदारी दीरीजी।

हनुमानगढ़ जिला मांय हरियाळो राजस्थान, एक पेड़ मां के नाम अभियान रा तैत 7 अगस्त ने हरियाली तीज रे मौके एके सागे 5 लाख ऊं बत्ता पौधा रोप्या जावेला। जिला कलेक्टर काना राम आ जाणकारी दीनी। वे बतायो के हाल ताई लगायी ज्या 5 लाख 15 हजार पौधां ने मोबाइल एप्लीकेशन रे जरिये जिओ टैग कर्या जावेला। चूरु मांय आज जिला कलेक्टर पुष्पा सत्यानी छायादार पौधा रोप्या।

प्रधानमंत्री नरेंद्र मोदी 28 जुलाई ने आकाशवाणी ऊं प्रसारित करया जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित कर्या जावण वाळा ई कार्यक्रम री 112 वीं कड़ी व्हेला। ई कार्यक्रम सारु आप ई विचार अर राय मुफ्त नम्बर 1800-11-7800 रे मार्फत दे सको हो।

जनसंख्या स्थिरता पखवाड़ा रा तहत जैसलमेर मांय जिला स्तर रो मान जळसो राख्थी ज्यो। ई मौके स्वास्थ्य अर परिवार कल्याण विभाग री ओर ऊं विकसित भारत की नई पहचान, परिवार नियोजन हर दम्पति की शान री सोच रा प्रचार प्रसार सारू स्वास्थ्य मेळो लगायी ज्यो अर प्रदर्शनी लगायी ज्यी। भीलवाड़ा मांय काल राख्था जावण वाळा कार्यक्रम मांय परिवार कल्याण रा हलका मांय बेहतरीन काम करण वाळां अहलकारां कर्मचारियां अर ए.एन.एम. रो मान कर्यो जावेला।

.....